



[Mottakernavn]
[Adresse]
[Postnr] [Poststed]
[Kontakt]

Saksbehandlar, innvalstelefon

Pernille Stordal Rønning, 71 25 84 83

Dispensasjon for innsamling av insekt til kartlegging - Vasselen naturreservat og Flåstranda og Hisdalen naturreservat - Tingvoll kommune

Statsforvaltaren i Møre og Romsdal viser til søknad av 29.03.2022 frå Steffen Adler og Øystein Folden om å sette opp feller og samle inn insekt for kartlegging i edellauvskog i Vasselen naturreservat og den nordlegast delen av Flåstranda og Hisdalen naturreservat som ligg i Tingvoll kommune.

Vedtak

Statsforvaltaren gir Steffen Adler og Øystein Folden dispensasjon frå § 3 andre ledd bokstav b og c i verneforskriftene for Vasselen naturreservat og Flåstranda og Hisdalen naturreservat til oppsett av insektfeller, bruke håv og ta belegg av insekt for kartlegging i samband med to kartleggingsprosjekt i 2022. Det er satt vilkår for dispensasjonen. Heimel for vedtaket er § 48 i naturmangfaldlova.

Vilkår

- Begge naturreservata har som formål å ta vare på sjeldne artar, og det er viktig at oppsett av feller ikkje påverkar naturverdiane i områda, fangst av levende dyr skjer skånsamt, og at det ikkje blir tatt ut meir enn det som er nødvendig for bestemming av artar.
- Fellene må fjernast frå områda etter bruk.
- Vedtaket er gyldig ut 2022.
- Artsfunna skal registrerast i Artsobservasjoner.

Søknaden

Steffen Adler og Øystein Folden ønsker å kartlegge og samle inn insekt i edellauvskog i Tingvoll og Grøvdalen i samband med to kartleggingsprosjekt. Dei har søkt støtte frå Sabima. Steffen Adler er medlem av Norsk entomologisk foreining, og Øystein Folden er medlem i Norsk botanisk foreining og styreleiar i Naturvernforbundet i Tingvoll. Det er søkt om å sette opp feller, bruke håv og ta belegg av insekt etter behov i Vasselen naturreservat, i Havdalen/Hisdalen i Flåstranda og Hisdalen naturreservat, i Dovrefjell-Sunndalsfjella nasjonalpark og Åmotan-Grøvdalen landskapsvern-område. Aktivitetar er innsamling av insekt (sommarfuglar, veps, rettingar, mm.) for nødvendig identifisering av artar og/eller belegg ved lysfelle, bruk av håv, rødvinfelle, skålfelle og fermonfelle. Identifiseringa skal skje ved observasjon, preparering, mikroskopering og eventuell kontakt med



ekspertar. Belegg blir foreløpig oppbevart i privat samling, men den kan bli flytta til offentlig samling. Omfang av kartlegginga er 3 representative areal i Tingvoll og 6 areal i Grøvdalen. Det er planlagt maks ein dag/natt med fangst per areal, i perioden april til oktober 2022. Resultat frå kartlegginga vil bli rapportert til Sabima og registrert i Artsobservasjoner.

Lovgrunnlaget

Søknaden er vurdert opp mot gjeldande verneforskrifter, fastsett ved kongeleg resolusjon 27.11.2020 (FOR-2020-11-27-2508) for Vasselen naturreservat og 17.12.2021 (FOR-2021-12-17-3683) for Flåstranda og Hisdalen naturreservat. Det er etter § 3 andre ledd bokstav b forbod mot skade, øydelegging og unødige forstyring på dyrelivet. I § 3 andre ledd bokstav c står det blant anna at det ikkje må settast i verk tiltak som kan endre naturmiljøet, for eksempel oppføring av mellombelse innretningar. Tiltaka i søknaden er ikkje omfatta av verneforskriftene, og må derfor ha dispensasjon frå vernereglane (jf. § 8) etter naturmangfaldlova (nml) § 48.

Statsforvaltaren har heimel for å gi dispensasjon frå verneforskriftene i § 48 i nml, der det heiter: *Forvaltningsmyndigheten kan gjøre unntak fra et vernevedtak dersom det ikke strider mot vernevedtakets formål og ikke kan påvirke verneverdiene nevneverdig, eller dersom sikkerhetshensyn eller hensynet til vesentlige samfunnsinteresser gjør det nødvendig. (...).*

Søknaden må vurderast etter prinsippa i nml §§ 8-12, jf. § 7. Dette er prinsipp som omfattar vurdering av kunnskapsgrunnlag (§8), føre-var-omsyn (§9), samla belastning (§10), kostnader knytt til ev. skade på naturmangfald (§11) og miljøforsvarleg teknikk og driftsmetode (§12).

Statsforvaltaren si vurdering

Formålet med Vasselen naturreservat er å ta vare på eit variert skogsområde som inneheld trua og sjeldan natur i form av rik edellauvskog og gammal furuskog. Skogen er velutvikla og med fleire sjeldne og kravfulle artar. Formålet med Flåstranda og Hisdalen naturreservat er å ta vare på eit variert og stort skogsområde som inneheld trua og sjeldan natur med store verdier i form av gammal furuskog, gammal lauvskog, rik edellauvskog, kalkskog og ei bekkekløft. Området representerer ein bestemt type natur i form av ei stor bratt skogli frå fjord til fjell, der stor høgdegradient gir eit variert artsmangfald. Området har særleg betydning for biologisk mangfald ved at det er lite påverka av inngrep og kontinuiteten i gamle tre og daudt trevirke er god. Området er velutvikla og leveområde for sjeldne artar, spesielt varmekrevjande artar av plantar, sopp og insekt. Det er ei målsetting for begge naturreservata å behalde verneverdiane i mest mogleg urørt tilstand, og eventuelt vidareutvikle dei.

Ein del av formålet for naturreservata er å ta vare på eit variert artsmangfald, med sjeldne artar. Dette inkludere også insekt. Innsamling til bestemming av artar blir gjennomført for å auke kunnskapen om kva slags artar som finst i områda, og er nyttig kunnskap m.a. for forvaltninga og for å ta betre vare på artane og område artane lever i. Nyten av kartlegginga er vurdert som større enn ulempa det vil vere av å samle inn insekt til identifisering.

Kartlegging vil auke kunnskap om artsmangfaldet i områda. Det skal samlast insekt på 3 areal i Tingvoll, og maks ein dag/natt på kvart område. Denne avgrensinga gjer at tiltaka ikkje utgjere noko stor trussel for artane, og kartlegginga i naturreservata vil ikkje påverke verneverdiane nemneverdig, jf. nml § 48. Heilskapen i naturreservata blir ikkje vesentleg påverka, jf. nml §§ 8 og 10. Det er satt vilkår for dispensasjonen, jf. nml §§ 11 og 12. Naturmangfaldlova § 9 er ikkje tillagt vesentleg vekt.



Denne dispensasjonen gjeld for dei to naturreservata som Statsforvaltaren i Møre og Romsdal er forvaltningsmyndigheit for. Søknad for dei resterande områda må behandlast av Dovrefjell nasjonalparkstyre.

Anna lovverk

Vi gjer merksam på at vedtaket berre omfattar dispensasjon frå verneforskrifta i medhald av naturmangfaldlova. Nødvendige løyve etter anna lovverk må avklarast med rette myndigheiter.

Klage på vedtak

Partane i saka eller andre med rettsleg klageinteresse kan klage på vedtaket innan tre veker frå det er mottatt. Klagen må vere grunngitt, og skal sendast til Statsforvaltaren. Miljødirektoratet avgjer klagen dersom Statsforvaltaren opprettheld vedtaket. Reglane om klage på vedtak går fram av kapittel VI i forvaltningslova.

Med helsing

Bjarne Otnes (e.f.)
fagleiar

Pernille Stordal Rønning
rådgivar

Dokumentet er elektronisk godkjent

Mottakere:

Steffen Adler
Øystein Folden

Brattbakken 1

6630

TINGVOLL

Kopi til:

TINGVOLL KOMMUNE

Midtvågvegen 2

6630

TINGVOLL